

M108S: Herzog Ernst A (S)

0,1 was daz mære vile liep
0,2 sich vröuwte alle diu diet
0,3 Otto der küninc guot
0,4 vröuwte sêre sînen muot
0,5 dô er rehte vernam .
0,6 umbe diu vrouwe lustsam
0,7 diu minniclîchen boteschaft
0,8 dô hiez er mit kraft
0,9 sîne brût louft stiften .
0,10 und gebôt in allen gerihten .
0,11 mit michelem lobe
0,12 den vürsten zuo hove
0,13 dô quâmen si zesamene
0,14 si huoben sich mit magene
0,15 hin nâch der vrouwen
0,16 dô mohte man schouwen
0,17 manigen rîtær gemeit
0,18 dô diu herzoginne Adelheit
0,19 dem keiser zuo wîbe wart gegeben
0,20 dô reit manic dietdegen .
0,21 spilente mit dem schilte
0,22 dô was daz gevilde
0,23 mit helden bevangen .
0,24 dô huoben si sich dannen
0,25 zuo Megenze an diu herberge
0,26 vile michel was menige
0,27 in roemischem rîche
0,28 en ne wart nie grôzer hov
0,29 dô was sanc und lust
0,30 wünne und êre
0,31 des was der küninc hêre
0,32 gelobet in manigem lande
0,33 dô gap er den wîganden
0,34 pfellel . diu breiten
0,35 moere mit den gereiten
0,36 golt und silber
0,37 und ander zierde manicvalte
0,38 di hiez er in vüre tragen

0,39 iu kan nieman gesagen
0,40 di wünne di si hæten .
0,41 mit êren si dô lebeten
0,42 dô diu brùtlouft was getân
0,43 di hêrren begonden vûre gân
0,44 und nâmen urloup
0,45 dô zergienç der michele hov
0,46 wîter wege
0,47 di tiurlîchen degene
0,48 di schieden sich alle vile vrô
0,49 dannen reit der küninc dô
0,50 mit der vrouwen wolegetân
0,51 iz was im harte wole ergân
0,52 der roemische hêre
0,52a –[...]
0,53 dô gap er im schône
0,54 mit keiserlîcher gâbe
0,55 und allen den ze wâre
0,56 di im gevolgeten dare
0,57 dô wart der degen wole geware
0,58 daz er in mit triuwen meinte
0,59 wie dicke er im bescheinte
0,60 manige vaterlîche dinc
0,61 als sîn eigenez kint
0,62 hielt er den hêrren
0,63 er half ouch sîner êren
0,64 swâ er ez mohte getuon
0,65 beide spâte und vruo
0,66 des was er in michelm lobe
0,67 in hiez vile dicke dâr zuo hove
0,68 der keiser an sînen rât gân .
0,69 dô konde wole der küene man
0,70 sprechen mit solichen zûhten
0,71 daz iz mit êren hoeren mohte
0,72 der keiser und daz rîche
0,73 er redete wîslîchen
0,74 swes sô er begunde
0,75 der helt wole kunde
0,76 aller slahte vrûmicheit
0,77 er was zuo aller zît gemeit
0,78 Ernest der herzoge
0,79 mohte wole dâ zuo hove
0,80 der keiser was im guot
0,81 und tet im liebes genuoc
0,82 daz verdiente der degen mære
0,83 umbe den küninc hêren
0,84 swâ er es bedorfte zuo der nôt .
0,85 des gap er im daz golt rôt

0,86 dicke âne wâge
0,87 mit triuwen si dô wâren
0,88 guote vriunde daz ist wâr
0,89 mit êren vile manic jâr
0,90 daz sie nie wurden gevêh
0,91 diz tet einem Heinriche wê
0,92 der was ein des keisers neve
0,93 [unde] sîn râtgebe
0,94 [der] hæte di pfalenze bî Rîne
0,95 der begonde den helt nîden
0,96 von keiner slahte schulde
0,97 wan daz er des keisers hulde
0,98 alsô wole hæte
0,99 dô gedâhte er waz er tæte
0,100 daz er si in entwente
0,101 und in sô geschente
0,102 daz er im von herzen würde gram
0,103 wende man ze hove niet vernam
0,104 alsô wole sô dâ bevorn
0,105 diz was im leit unde zorn .
0,106 dô begunde der ungetriuwe man
0,107 mit listen vüre den küninc gân
0,108 er sagete im wærlîchen
0,109 in wolte von dem rîche
0,110 der herzoge stôzen
0,111 er hüebe sich sô grôze
0,112 “im sint di vürsten alle holt”